

Declaración institucional polo Día Internacional para a Eliminación da Violencia contra as Mulleres

Como cada 25 de novembro, hoxe situamos na axenda social e política o Día Internacional da Eliminación da Violencia contra as Mulleres, data fixada polas Nacións Unidas en 1999 para a concienciación e acción contra un dano que é estrutural, que está enraizado na cultura e na conciencia social e co que temos que acabar.

Desde a Deputación da Coruña queremos expresar o máis absoluto rexeitamento a todas as formas de violencia machista e reafirmamos o noso compromiso político e institucional coa súa erradicación. Poñer fin á violencia machista debe ser un obxectivo irrenunciábel e prioritario de todas as persoas que formamos parte da nosa sociedade.

Conmemoramos un ano máis este día nun contexto en que a violencia machista segue a ser unha realidade diaria, insorportábel. As estatísticas de feminicidios en España seguen a ser moi alarmantes, con 1.321 mulleres asasinadas polas súas parellas ou exparellas desde o ano 2003, e delas, 27 entre xaneiro e outubro de 2025, dúas en Galicia. Deixaron 16 nenos e nenas orfos.

Desde a Deputación da Coruña queremos facer visíbeis durante os 365 días do ano todas e cada unha das formas de violencia machista que existen na nosa sociedade e hoxe facemos tamén mención a elas, e dun xeito especial ás que sofren as mulleres máis vulnerábeis: mulleres de contornas rurais con dificultades para acceder aos servizos públicos, mulleres inmigrantes e mulleres con discapacidades, as primeiras, padecen situacións cotiás que dificultan o acceso aos servizos de protección e iso intensifica o seu desamparo e as segundas, encontran barreiras físicas e sociais que entorpecen solicitar axuda, formalizar denuncias e acceder aos servizos de protección e asistencia.

Na Deputación tamén facer mención e loitar contra o avance dos discursos negacionistas e das correntes reaccionarias que pretenden disfrazar o machismo como elección ou estilo de vida. Movementos como o das *tradwives* ou a estética *coquette* difunden, sobre todo entre a mocidade, unha perigosa idealización da submisión feminina, da dependencia económica e da volta aos roles de xénero tradicionais. Estes discursos non son inocentes: forman parte dunha estratexia que pretende conseguir un retroceso global que tenta desactivar o feminismo e perpetuar as desigualdades.

A violencia machista adopta hoxe novas formas: non só física, sexual ou económica, senón tamén simbólica e dixital. As redes sociais convértense en espazos onde se estende o acoso, a manipulación e o control sobre as mulleres, especialmente sobre as máis novas, a través da presión estética, o odio e a difusión de contidos que normalizan a desigualdade. Combatela require educación, pensamento crítico e políticas públicas con perspectiva feminista. Todas as persoas temos un papel nesta loita.

Desde a Deputación da Coruña confirmamos a nosa aposta política e institucional na loita contra a violencia machista desenvolvendo accións, formacións e campañas que cheguen a todos os concellos da provincia e polo tanto, a todas e cada unha das persoas que habitan o territorio, poñendo o foco na prevención, na igualdade e na liberdade das mulleres. Reclamamos unha maior coordinación entre administracións e recursos e servizos 100% públicos que garantan atención integral, acompañamento e reparación ás vítimas.

A perspectiva global é imprescindible. Nos escenarios de conflito armado, desprazamento forzoso e explotación económica, as mulleres enfróntanse a violacións masivas dos seus dereitos: violencia sexual, escravitude e negación da súa dignidade. Estendemos a nosa loita a todas elas, porque non haberá xustiza plena mentres persista a violencia contra calquera muller.

Este 25 de novembro voltamos erguer a voz, firmes e decididas, contra todas as violencias e contra quen pretende inverter os avances conquistados. O feminismo é a nosa ferramenta de liberdade, igualdade e xustiza. O camiño é irreversible: as mulleres exiximos vivir sen medo, libres e respectadas.